


*PAGPANAG-IYA SA
GANGHAAN SA KAAWAY
PAGHUMAN SA PAGSULAY*

 Ginahunahuna nga...Kabalo mo, aduna ko'y usa ka gamay'ng ideya, sama, nga makita ang mga tawo nga nagatindog pag-nagabasa kita sa Pulong. Gusto ba ninyo kana? Nagatindog kita aron sa pagpanumpa, nagatindog kita alang sa atong nasud, nganong dili man motindog alang sa Pulong karon?

² Samtang nga nagatindog kita sa makadiyut. Ginabasa ko niadto ang usa ka artikulo, dili pa lang dugay, ug gihunahuna ko kagabii kadtong mga tawo nga nanagbarug alang kang Cristo. Kung wala pa ninyo mabuhat kini, mahimo n'yo bang buhaton kini karon?

³ Aduna kaniadto og usa ka halangdon nga ebanghelista, mga setentay-singko na ka tuig ang milabay, dili ko lang madumduman ang iyang ngalan. Siguro si Arthur McCoy kadto, ug iya nang nalatas ang kayutaan. Ug usa niana ka gabii aduna siya'y damgo nga miadto siya kono ngadto sa Kahimayaan. Ug ingon pa nga miduol siya kono didto sa Ganghaan, ug nag-ingon siya nga dili siya kono nila pasudlon. Ug miingon kono siya, "Ako si Arthur McCoy nga taga-Estados Unidos. Usa ako ka ebanghelista."

⁴ Busa misulod ang tigbantay sa pultahan, (usa kini karon ka damgo), ug misulod kini, miingon, "Dili ko man gyud makita ang imong ngalan."

Miingon siya, "Bueno, usa man ako ka ebanghelista."

Miingon kini, "Sir, akong . . ."

⁵ Miingon siya, "Bueno, aduna ba'y kahigayonan nga . . . May problema."

⁶ Miingon kini, "Wala, sir. Ania ang Libro kanako. Dili ko man lang makita ang imong ngalan."

Ug miingon siya, "Bueno, aduna ba ko'y mahimo og unsa man mahitungod niini?"

⁷ Miingon kini, "Mahimo mong iapela ang imong kaso ngadto sa Hukmanan sa Puting Trono." Dios, tabangi intawon ako. Dili ko gustong mahiadto didto.

⁸ Miingon siya, "Bueno, kung kana ang bugtong ko nga paglaum, siguro iapela ko na lang ang akong kaso kung ingon-ana."

⁹ Ug dayon ingon pa nga gihunahuna niya nga mipaingon siya ngadto sa halayo kaayo, ug lamang... Ug sa diha nga misugod siyang, ingon pa nga mangitngit niadto, ug nagkasanag ug nagkasanag pa, ug ingon pa nga daw sama sa wala na'y kahunongan kadto nga Kahayag, apan atua siya mismo sa taliwala Niadto. Ug miingon kono Kadto, "Kinsa man kining nagaduol sa Akong Trono sa Paghukom?"

¹⁰ Miingon siya, "Ako si Arthur McCoy. Usa ako ka ebanghelista, nakapanghatod ug daghang mga kalag ngadto sa Ginghamarian."

Miingon Kadto, "Nakita ba ang imong ngalan diha sa Libro?"

"Wala."

Miingon, "Kung ingon-ana miapila ka sa Akong Hukmanan?"

"Oo, sir."

¹¹ "Makadawat ka og hustisya. Ginahukman Ko ikaw pinaagi sa Akong mga balaod. Arthur McCoy, nakapamakak ka ba sukad-sukad?"

¹² Miingon siya, "Abi ko nga usa na ako ka butan nga tawo hangtud nga nagtindog ako didto niadtong Kahayag." Miingon siya, "Apan diha sa Atubangan niadtong Kahayag, usa ako ka makasasala." Mamahimong ingon niana kitang tanan. Mahimong mobati ka nga luwas ka karon, apan hulata nga moabot ka Didto. Unsa man sa hunahuna n'yo ang bation n'yo dinhi sa diha nga nagapangdihog Siya? Mabati mong pagkagamay gayud nimo! Unsa kaha kini pagdidto na sa nianang Puting Trono sa Paghukom?

Miingon Kini, "Nakapamakak ka ba sukad?"

¹³ Miingon siya, "Abi ko nga matinuuron na ako, apan adunay pipila ka gagmay'ng mga butang nga nahunahunaan ko nga medyo gamay nga mga pagpamakak, nahimo ang mga niini nga dagku ug maitum Didto."

Miingon siya, "Oo, sir, nakapamakak ako."

Miingon Kini, "Nakapangawat ka ba?"

¹⁴ Miingon siya, "Abi ko nga matinud-anon na ako mahitungod niini, ug nga wala gyud nangawat, apan ingon pa, sa Atubangan niadto nga Kahayag, ako—naamgo ko nga adunay pipila ka mga transaksyon nga nahimo ko, nga dili gayud husto."

Miingon siya, "Oo, sir, nakapangawat ako."

Miingon Kini, "Ang hukom Ko..."

¹⁵ Ug sa diha nga andam na niyang madungog ang silot kaniya, "Pahawa og ngadto ka sa kalayo nga walay pagkapalong nga gitagana alang sa yawa ug sa iyang mga manolunda," ingon pa nga ang matag bukog niya halos magkabungkgang na.

¹⁶ Miingon, “Nadungog ko ang pinakamatam-is nga tingog nga karon ko pa nadungog sa tibuok kong kinabuhi.” Miingon siya, “Sa paglingi ko aron tan-awon, nakita ko ang pinakamalumong nawong nga nakita ko sukad-sukad; mas malumo pa kay sa nawong sa usa ka inahan, tingog nga mas matam-is pa kay sa pagtawag kanako sa akong inahan sukad-sukad.” Miingon, “Milantaw ako. Nadungog ko ang usa ka tingog, miingon, ‘Amahan, tinuod kana, nagpamakak siya ug dili siya nahimong matinud-anon kaniadto. Apan, didto sa yuta mibarug siya alang Kanako,’ miingon, ‘karon magatindog Ako alang sa iyang lugar.’”

¹⁷ Ingon niana ang gusto ko nga mahitabo Didto. Gusto ko nga mobarug alang Kaniya karon, nga, pagmoabot kana nga panahon, motindog Siya alang sa akong lugar.

¹⁸ Atong basahon gikan sa Genesis 22; sa ika-15, ika-16, ika-17, ug ika-18 nga bersekulo.

Ug ang manolunda sa GINOO nagtawag kang Abraham sa ikaduha gikan sa langit.

Ug miingon siya, Tungod sa akong kaugalingon nanumpa ako, nagaingon ang GINOO, nga tungod kay gibuhat mo kini, ug wala ka magdumili kanako sa imong anak, sa imong bugtong anak.

Sa pagpanalangin ikaw pagapanalanginan ko, . . . sa pagpadaghan pagapadaghanon ko ang imong kaliwatan ingon sa mga bitoon sa langit, ug ingon sa balas nga mga atua sa baybayon sa dagat; ug ang imong kaliwatan manag-iya sa mga ganghaan sa iyang kaaway;

Ug diha sa imong kaliwat mapanalanginan ang tanan nga mga nasud sa yuta; kay gituman mo ang akong tingog.

Magaampo kita.

¹⁹ Langitnong Amahan, gamita ang maong teksto karon, Ginoo, ug magministeryo Ka kanamo. Hinaut nga dalhon sa Balaang Espiritu ang maong mga Pulong, Ginoo, ngadto mismo sa matag kasingkasing. Nga tagbuon ang among mga gipaabot niining hapon, kay daghan ang mga niini, Ginoo. Ug nag-ingon Ka kanamo nga mangayo og daghan, aron nga mamahingpit ang among kalipay. Amo kining ginapangamuyo sa Ngalan ni Jesus. Amen.

Mahimo na kamong manglingkod.

²⁰ Kung pagahinganlan ko man kining usa ka teksto, sa pipila ka minuto. Hinay ang akong tingog, mao kana ang hinungdan nga kinahanglan kong magtindog nga duol sa mikropono. Kabalo ko nga adunay paglanog, apan agwantahon nato kini’g diyutay. Gusto kong tawgon kini: *Pagpanag-iya Sa Ganghaan Sa Kaaway Paghuman Sa Pagsulay.*

²¹ Nagaabli ang atong esena diha sa usa sa pinakamakahibulongang mga esena diha kang Abraham. Kabalo na mo nga si Abraham mao ang amahan sa mga matinoohon. Ug nga gihatag ang saad ngadto kang Abraham. Ug ang pagka-manununod lamang uban kaniya, pinaagi kang Cristo, mao lamang ang paagi nga madawat nato ang saad, maoy pinaagi kang Abraham. Karon, usa lamang ka yanong tawo si Abraham, apan tinawag siya sa Dios ug matinud-anon siya sa nianang pagkatinawag. Sa diha nga misulti ang Dios ngadto kaniya, wala gayud ni usa ka higayon nga giduhaduhaan ni Abraham kadto nga tingog. Mipabilin siya mismo niini. Bisan unsa pa ang mga kalisdanan kaniadto, mipabilin siya mismo niini.

²² Ug dayon gisaaran siya og usa ka anak nga lalaki. Ug naghulat siya og bayte-singko ka tuig aron madawat kadto nga anak, nga gipakaingon ang unsa mang butang nga sukwahi niini nga dili ingon niana. Ug dayon, ug sa niining anak nga lalaki, ang tanang pamilya sa kalibutan pagapanalanganan. Ug matinud-anon ang maong patriarka sa iyang pagkatinawag ug sa gisaad nga Pulong.

²³ Usa siya kaniadto ka ehemplo sa mamahimong unsa kita kinahanglan. Karon kita, ingon nga mga patay na diha kang Cristo, mga Binhi kita ni Abraham.

²⁴ Karon, aduna kaniadto og duha ka binhi si Abraham. Ang usa kanila maoy natural nga binhi; ang usa usab maoy usa ka espirituwal nga Binhi. Ang usa kanila natural, pinaagi sa iyang unod; ang usa usab mao ang Binhi sa iyang pagtoo, ang pagtoo, aron usab nga mamahimo kitang Binhi ni Abraham pinaagi sa gisaad nga Pulong.

²⁵ Ug karon human nga gisulayan siya sulod sa kadugayon nga baynte-singko ka tuig, ug, imbis nga mangluya, nagmalig-on hinoon siya. Kita n'yo, kung wala man kini nahitabo sa unang tuig, pagkasunod nga tuig mamahimo na kining mas daku pa nga milagro, tungod kay duha na kini ka tuig. Ug gitigum niya kadtong mga tuiga, sa diha nga nagakatiguwang na siya, ug nagkaluya na ang iyang lawas. Ang mga tagoangkan ni Sarah, ang tagoangkan, o kini (nahimong) menopos na. Ug busa wala na si Abraham og kusog, ug adunay . . . Imposible na gayud kadto.

²⁶ Nahunahunaan n'yo ba kung unsa ang gihimo sa Dios didto? Kita n'yo, dili lamang Niya nga gihimong makaanak ang iyang tagoangkan. Kay, hinumdumi, kung gihimo Niya kadto, kung ingon-ana hinumdumi kung gihimo Niya kadto. . . wala sila kaniadto og niining mga panglawas ug pangpadede nga mga beberon, sa ilang mga adlaw, aron mapasoso sa bata, ang gatas nga gikan sa baka. Kita n'yo? Kinahanglan niya usab. . . Naughan na ang mga ugat nga ginaagian sa iyang gatas. Busa

Siya—Siya’y dili mahimong . . . Kinahanglan aduna gyu’y butang nga mahitabo.

²⁷ Dayon, tan-awa n’yo ang usa ka babaye, usa na ka gatus ka tuig ang katigulangon, nga magbatì pa sa pagpanganak. Dili na unta masarangan kadto sa iyang kasingkasing. Malisud na gani alang sa usa ka babaye, nga kuwarenta na ka tuig ang panuigon, nga buhaton kini. Dili na kini masarangan sa iyang kasingkasing. Busa kabalo ba mo kung unsay Iyang gibuhat? Kung mahimatikdan ninyo . . .

²⁸ Karon kabalo ako nga mahimong daghan ang dili mouyon. Kung okey lang nga buhaton kini nga pamahayag? Kita n’yo, Akong . . . Kaugalingon ko lang kini nga panghunahuna.

²⁹ Kita n’yo, ang Biblia usa ka supernatural nga Basahon. Gisulat Kini aron nga maililong gikan sa mga eskwelahan, sa mga teologo. Pila man ang nakahibalo niana? Gipasalamat kaniadto ni Jesus ang Dios. Miingon Siya, “Nagapasalamat Ako Kanimò, Amahan, nga Imong gililong Kini sa mga makinaadmanon ug mga masinabuton, ug gipahayag Kini ngadto sa mga bata nga makakat-on pa.” Usa Kini ka Basahon sa gugma. Sa dihang misulod ang gugma sa Dios sa kasingkasing, kung ingon-ana pagahigugmaon mo ang Dios, dayon igapadayag Niya ang Iyang Kaugalingon, ang kahulogan sa Biblia. Ang kahubaran sa Biblia mao ang Dios Mismo nga nagahubad sa Iyang mga saad. Apan, ang Biblia, gisulat Kini nga gitago ang kahulogan.

³⁰ Karon, sama sa akong asawa, oh, siya mao ang pinakamaanindot nga babaye sa tibuok kalibutan, ug gihigugma ko gayud siya. Gihigugma niya ako. Busa kung layo man ako sa among panimalay, padalhan niya ako og sulat, nagaingon, “Minahal kong Bill, bag-o ko lang karong gabii gipakatulog ang mga bata. Nanglaba ako karong adlaw, ug tanan na nga iyang gibuhat, ug uban pa.” Karon ginasulti niya kana diha sa sulat. Apan, nakita n’yo, gihigugma ko siya og ayo, ug usa ra gayud kami, hangtud nga akong—mabasa ko ang kahulogan niini. Nakahibalo ako kung unsay gusto niyang isulti, kita n’yo, isulti man niya kana kanako o dili, kita n’yo. Ako—kabalo na ako kung unsay iyang ginapasabot, tungod kini sa akong gugma kaniya, ug sa akong pagsabot.

³¹ Bueno, sa ingon niana nga paagi gisulat ang Biblia. Kita n’yo? Ang—ang mga iskolar labyan-labyan lang mismo nila kini; dili gyud nila kini masabtan. Kita n’yo, kinahanglan nga nahigugma gayud ka sa Pulong, Kaniya, “ang maila gayud Siya.” Kita n’yo?

³² Karon, karon dinhi, bantayi kung unsay Iyang gibuhat. Karon parehong tigulang na si Abraham ug si Sarah, “tigulang na kaayo,” ang ingon sa Biblia. Karon dili lang kini tungod nga

sila mga tawo lamang nga nabuhi sa taas nga panahon kaniadto. Nag-ingon ang Biblia nga, “Sila mga tigulang na gayud kaayo.”

³³ Karon himatikdi, pagkahuman mismo nga mipakita kini nga manolunda, nga kaganina pa natong gihisgotan; nga mao si Elohim, ang Dios. Ug miingon Siya, giingnan si Abraham, “Pagaduawon Ko ikaw pagmoabot na ang gitiman-an nga panahon.” Karon himatikdi sugod pa kaniadto hangtud karon, mga tipo kini sa Iglesia, sugod pa kaniadto.

³⁴ Karon tan-awa. Ania kung unsay nahitabo. Karon, dili nga gipatsing-patsingan Niya lang si Sarah, ug gipatsing-patsingan lang si Abraham. Gibalik Niya sila mismo ngadto sa pagkabatan-ong lalaki ug babaye. Karon daw sa pagkatalagsaon kana, apan himatikdi ang uban pa nga Pulong, ug hiusaha kini tanan. Dinihogan ang Pulong, ug kinahanglan kang madihogan uban sa Pulong. Karon, hinumdumi, dihadiha human niadto, dihadiha human sa pagpakita sa niining Manolunda . . .

³⁵ Daw sa makita ko kadto, kadtong ubanon na nga buhok ni Sarah, gamayon nga lola nga may panyolon diha sa iyang abaga, ug nagkalo para di-maabogan, nga nagsungkod na, nagalakaw-lakaw. “Ako, magkaaduna pa og kalipay diha sa akong ginoo, ug siya nga tigulang na man, usab?” Kita n’yo? Ug ania si Abraham, kining hataas na ang balbas, nagsungkod, tungod nga siya, tigulang na man.

³⁶ Ug makita ko, pagkasunod buntag, nga misugod og katulid ang iyang mga abaga, nawala na ang pagkabukubuko sa iyang likod. Misugod na panumbalik ang buhok ni Sarah. Ningbalik sila ngadto sa pagkabatan-on nga lalaki ug babaye. Nga nagapakita lang kung unsa ang Iyang buhaton ngadto sa mga Harianong Binhi ni Abraham, kita n’yo, sa diha nga kita “mangausab sa kalit lang, diha sa usa ka pagpamilok, ug tingub nga pagasakgawon.”

³⁷ Himatikdi kung unsay nahitabo. Karon tugoti nga mapamatud-an ko kini kaninyo. Karon mipanaw sila gikan niadtong lugar kung asa sila kaniadto, didto sa Gomorra; ug mibiyahang hangtud ngadto sa Gerar, didto sa kayutaan sa mga Filistehanon. Nahimatikdan ba ninyo? Markahi kini diha sa mapa, kung unsa kini kahalayo. Taastaas nga panaw alang sa usa ka tigulang na nga magtiayon sa nianang katigulangon.

³⁸ Ug dayon, gawas pa niana, didto—didto sa kayutaan sa mga Filistehanon, adunay usa ka batan-on nga hari nga gihinganlan og Amalek, ug nagapangita siya kaniadto og maasawa. Ug atua na kaniya ang tanang matahum nga Filistehanong mga babaye, apan sa dihang nakita niya si lola, miingon siya, “Maanyag siya kaayo nga pagatan-awon,” ug nahigugma siya kang Sarah ug gusto niya kining pangasaw-on. Husto kana. Uh-huh. Kita n’yo, matahum si Sarah. Kita n’yo?

³⁹ Mibalik siya ngadto sa pagkabatan-ong babaye. Himatikdi, kinahanglan niya kadto, aron maipanganak kadto nga bata. Gihimo siya sa Dios nga usa ka bag-ong linalang. Ug kinahanglan niya gayud, aron sa pagmatuto niining bata. Ug hinumdumi, si Abraham, “ang iyang lawas nga daw sa patay na,” ug namatay kaniadto si Sarah sa diha nga si Abraham. . . si Isaac kuwarentay singko na ka tuig ang panuigon, nagtoo ko, sa dihang namatay si Sarah. Ug nagminyo si Abraham sa usa pa ka babaye ug nagkaaduna pa og pito ka anak nga mga lalaki walay labot sa mga anak nga babaye, human niadto. Ha-ha! Amen.

⁴⁰ Kita n’yo, basaha ninyo nga nasabtan ang kahulogan niini. Usa kini ka tipo. Ginapakita niini dinha kung unsa ang Iyang pagabuhaton ngadto sa tanang Mga Anak ni Abraham. Haduol na gayud kita mismo niini karon, mao nga ang atong nanangtikubo na nga mga abaga ug tanan na walay unsa man nga diperensya, mga higala. Ug ang ubanon na natong mga buhok ug unsa pa man kini, dili na kini igsapayan karon. Wala na kita nagatan-aw balik. Nagalantaw kita nga paabante ngadto sa kung unsay atong padulngan.

⁴¹ Ug hinumdumi, kining ilhanan nga atong makita, mao ang kaulahiing ilhanan nga nakita kaniadto ni Abraham ug sa iyang Sarah, sa wala pa miabot ang gisaad nga anak. Nagatoo kita nga ania na kita nianang taknaa.

⁴² Ang maong patriarka, human nga nahimugso kini nga batang lalaki. Mahunahuna ba ninyo si Isaac, nga mga dose ka tuig ang panuigon kaniadto; makahimuot nga gamay’ng, batang lalaki nga kulot ang buhok, kapihon ang kolor sa mga mata? Mahunahuna ko kung unsa ang gibati niadtong inahan; matahum nga batan-ong babaye, ug mao usab, ug ang iyang amahan. Ug usa niana ka adlaw, miingon ang Dios, karon, alang sa usa ka panig-ingnan; napalayo na kita, hapit na ang oras. “Gihimo Ko ikaw nga usa ka amahan sa mga nasud, pinaagi niining bataa, apan gusto Ko nga dalhon mo kini nga bata ngadto sa kinatas-an sa bukid nga Akong igapakita nimo, ug gusto Ko nga patyon mo siya didto, ingon nga usa ka halad.” Mahunahuna kaha ninyo kana?

⁴³ Karon wala pa gyud mo naingnan nga moagi sa usa ka pagsulay nga sama niana. Wala na Niya kana ginabuhat sa karon. Mga panig-ingnan lang kadto, mga landong.

⁴⁴ Nahadlok ba si Abraham? Wala, sir. Ingon niini ang gisulti ni Abraham, “Hingpit akong masaligon nga arang Niyang mahimo nga banhawon siya gikan sa mga patay, kay gidawat ko siya kaniadto ingon nga gikan sa mga patay. Ug kung kadto nga sugo sa Dios nag-ingon kanako nga buhaton kini, ug nga nagpabilin ako nga matinuuron niini, ug maayo ang resulta, mao nga nahatagan ako’g anak nga lalaki; mahimo sa Dios nga banhawon

siya gikan sa mga patay; kon diin ko siya kaniadto nadawat, ingon nga usa ka panig-ingnan.”

⁴⁵ Oh, akong, higala! Kung kamong mga Pentecostal gihatagan sa Dios og Espiritu Santo, nagasulti diha sa laing mga dila, unsa ka labi pang angay ninyong toohan ang Iyang gahum sa pagpang-ayo, ug ang Iyang kaayo ug kalooy! Kung gihimo Niya kana, nga supak sa tanang mga teologo sa nasud! Nanag-ingon sila nga dili kini mahimo, apan gibuhat kini sa Dios tungod kay gisaad Niya kini. Kung ingon-ana magbarug nga gunit ang inyong Pusil, ang inyong Pulong, ang inyong Espada, toohi ang Pulong sa Dios. Ingon niana ang gisulti sa Dios, ug mao na gyud kana!

⁴⁶ Himatikdi, karon, gidala niya siya diha sa tulo ka adlaw nga panaw gikan didto, dala ang mga mula. Karon makalakaw ako, sa dihang atua pa ako sa pagpatrolya kaniadto, nagalakaw ako og traynta ka milya matag adlaw, latas sa kamingawan; ug aduna kami og di-gasolina nga mga tiil, kung ingnon pa nato. Apan silang mga tawo kaniadto, ang paagi lamang sa ilang pagbiyahe, mao ang pagsakay diha sa usa ka asno o—o ang paglakaw. Ug mibiyahe siya diha sa tulo ka adlaw gikan sa kung asa siya nagsumikad, ug milantaw siya, ngadto sa kamingawan, ug nakita ang maong bukid didto sa halayo.

⁴⁷ Gikuha niya si Isaac ug gigapus ang mga kamot niini. Nga, nakahibalo na kita, sa Genesis 22 dinhi, nga usa ka tipo ni Cristo. Gidala kini patungas sa bukid, nga nakagapus, sama ni Jesus nga gidala patungas sa bukid, sa Bukid sa Kalbaryo; usa ka tipo sa Dios nga ginahalad ang Iyang Anak, siyempre.

⁴⁸ Apan sa diha nga nakaabot na sila didto, ug matinumanon siya, nga medyo nagsuspitsa na si Isaac. Miingon siya, “Amahan, ania ang kahoy, ania na ang halaran, ania na ang kalayo, apan hain na man ang halad?”

⁴⁹ Ug si Abraham, nga nakahibalo na diha sa iyang hunahuna, bisan pa niana nga atua na ang Pulong sa Dios didto, miingon siya, “Anak ko, mahimo sa Dios nga magtagana og usa ka halad alang sa Iyang Kaugalingon.” Iyang gitawag ang maong lugar, “Jehovah-Jireh.”

⁵⁰ Ug sa diha nga gigapus niya ang iyang anak, nagmasinugtanon kini ngadto sa kamatayon; gipahimutang kini ibabaw sa halaran, gihulbot ang kutsilyo gikan sa sakuban niini, ug gisugdan na ang pagtapos sa kinabuhi sa kaugalingon niyang anak. Ug, diha sa sugdan na niya, May Butang nga nagpugong sa iyang kamot, ug miingon, “Abraham, pugngi ang imong kamot.”

⁵¹ Ug niadtong higayona, usa ka carnero nga lake ang mibahihi, sa likod niya, nga ang mga sungay niini nasangit didto sa kasagbutan.

52 Nahunahunaan n'yo na ba, kung asa kaha gikan kadto nga carnero? Hinumdumi, puno ang maong lugar sa mga leon ug mga lobo ug mga jackal, ug kadtong mga mananap nga nagakaon og mga carnero. Ug kung unsa siya niadto kahalayo sa sibilisasyon? Ug, dayon, didto pa sa itaas sa maong bukid, kon diin walay tubig. Ug iyang gipangpunit ang mga bato, sa palibot, aron buhaton ang halaran. Asa man diay gikan kadto nga carnero? Kita n'yo?

53 Apan dili kadto usa ka panan-awon. Gipatay niya ang mao nga carnero; may dugo kini. Unsay iyang giingon? “Mahimo sa Dios magtagana og usa ka halad alang sa Iyang Kaugalingon.”

54 Unsaon *mo* kaha paghawa gikan nianang lingkuranan? Unsaon kaha pagkaayo *nianang* batang may paralisis, o *ikaw* nga mapahawa gikan nianang lingkuranan, *ikaw* nga mapahawa gikan dinha, *ikaw* nga may sakit sa kasingkasing? Unsa man kini nga problema, “Mahimo sa Dios nga magtagana alang sa Iyang Kaugalingon.”

55 Gitooan kadto ni Abraham. Nagpabilin nga matinud-anon ang patriarka sa maong saad. Ug gihatag Niya ang saad, nga, “Ang imong binhi! Tungod kay gitooan mo ang Akong Pulong, ug bisan unsa pa man ang kahimtang, pagapanag-iyahan sa imong binhi ang ganghaan sa iyang mga kaaway.”

56 Ngano man? Ang matag kaaway nga ningtungha, ingon nga mga panig-ingnan, batok kang Abraham, si Abra-. . . Ang kaaway nga, “Tigulang na kaayo si Sarah. Tigulang na ako kaayo. Tanan *kini*, ug tanang uban pa.” Nagpabilin siya sa gihapon nga matinud-anon mismo ngadto nga saad.

57 Karon, ang tawo nga aduna nianang pagtoo, magasalig sa gihapon sa Pulong sa Dios bisan unsa pa man ang kahimtang. Karon, kung dili mo kana mahimo, kung ingon-ana dili ka Binhi ni Abraham. Ingon niana ang pagtoo nga aduna kang Abraham, sa iyang Binhi.

58 Ang saad kang Abraham mao nga ang iyang “Binhi,” karon ang iyang harianong Binhi, usab, sama sa giingon ko na kaninyo kaganina. Ug kining selyo nga gihatag Niya kang Abraham, maoy usa ka selyo sa saad. Ug ang harianong Binhi, sumala sa Mga Taga-Efeso 4:30, maoy “giselyohan na sa Espiritu Santo,” human nga nagmadaugon sila sa pagsulay. Sulayi n'yong hunahunaon kini.

59 Daghang nagdahum nga anaa na kanila ang Espiritu Santo. Daghan ang nagaangkon nga adunay Espiritu Santo. Daghang tawo ang makapakita og daghang mga ebidensiya ug mga ilhanan niini. Apan, sa gihapon, kung dili kini makapabilin niining Pulong, dili kini ang Espiritu Santo. Kita n'yo?

60 Toohan ninyo ang matag Pulong, dayon pagaselyohan kamo pagkahuman sa maong pagsulay. Sa diha nga ginatooan nato ang matag saad diha sa Pulong, kung ingon-ana pagaselyohan

kita sa Espiritu, aron panghimatud-an ang saad. Mao kana, ingon niadto si Abraham, ang paagi nga gibuhat niya kadto. Sa ingon niana, ug sa ingon niana lamang, nga magkaaduna kita'y katungod nga mapanag-iyahan ang ganghaan sa atong kaaway. Dili ninyo mahimo kana hangtud mahimo usâ kamo og ingon niana nga Binhi. Hinumdumi, diha sa Biblia . . .

⁶¹ Naghisgot ako bahin niini, didto sa Houston o asa man, niadtong . . . o, sa Dallas ang pasabot ko. *Ang Timaan.*

⁶² Kita n'yo, ang usa—usa ka Judio makapakita, didto sa Israel, nga usa siya ka Judio pinaagi sa circuncision. Apan nag-ingon ang Dios, “Kung makita Ko ang dugo! Ug ang dugo mamahimong usa ka timaan alang kaninyo.”

⁶³ Ang kinabuhi nga atua sa dugo dili mahimong mobalik ngadto sa magsisimba, tungod kay, bueno, kinabuhi kadto sa mananap, usa lamang kadto ka landong paingon ngadto sa tinuod nga Kinabuhi. Dayon, ang kemikal, ang dugo mismo, kinahanglan nga mamahimo nga pula gayud diha sa pultahan ug sa mga haligi sa pultahan.

⁶⁴ Ithaplas pinaagi sa hisopo, nga usa lamang ka yanong sagbot, nga nagapakita nga dili ninyo kinahanglan nga magkaaduna pa og unsa man nga hilabihan nga pagtoo. Kinahanglan mo lang nga magkaaduna og mao ra, nga pagtoo nga aduna ka, sama nga paandaron mo ang imong sakyanan, mag-adto sa simbahan. Kita n'yo? Daghan nga mga tawo ang nagahunahuna nga kinahanglan may ginaangkon gyud silang . . . Apan, dili, dili, sayup kana. Ordinaryo lamang nga pagtoo ang kinahanglan mo aron maihaplas ang Dugo. Patalinghugi ang Pulong, ug toohi ang Pulong, iaplikar Kini, kana lang. Ang mapunit lamang nga sagbot bisag asa didto sa Palestina, mao ang hisopo, usa lang ka gamay nga sagbot nga mitubo gikan sa mga siak sa mga pader, ug sa palibot, nga gituslob diha sa dugo ug gipahid sa balabag ug sa mga haligi sa pultahan.

⁶⁵ Ug, hinumdumi, dili ko igsapayan kung bisan unsa pa sila ka anaa kaniadto sa pakigsaad, bisan unsaon pa pagpakita sa Judio nga nasirkunsisyon siya, bisan unsa pa ka buutan siya nga tao, walay bili ang tibuok nga pakigsaad gawas kung ang—ang timaan anaa dinha. “Kung makita Ko ang dugo,” lamang.

⁶⁶ Karon, ang Dugo karon, ang Timaan, dili ang kemikal, ang kemikal sa Dugo ni Cristo, tungod kay giula Kini nga duha na ka libo ka tuig ang milabay.

⁶⁷ Apan, nakita n'yo, kon diin ang . . . gikinahanglan ang kemikal didto, ang kinabuhi sa mananap dili man puedeng moadto sa tawo, tungod kay walay kalag ang kinabuhi sa mananap. Wala ang mananap nahibalo kung unsa ang husto ug sayup. Ang tawo ang maoy adunay kalag.

⁶⁸ Karon, apan sa diha nga si Jesus, ang Anak sa Dios, nga gihimugso diha sa ulay, giula ang Iyang Dugo, ang Kinabuhi

nga anaa nianang Dugo mao ang Dios Mismo. Nag-ingon ang Biblia, “Giluwas kita pinaagi sa Kinabuhi, sa Dugo sa Dios.” Dili sa dugo sa usa ka Judio, dili sa dugo sa usa ka Gentil; kondili sa Kinabuhi sa Dios. Gilalang sa Dios kining selula nga Dugo, nga gihimugso sa ulay. Walay kinsa man nga lalaki nga nakapanghilabut sa maong ulay, wala usab siya . . . ni ang itlog wala usab naggikan kaniya.

⁶⁹ Nakahibalo ako nga daghan kaninyong mga tawo ang gustong motoo nga sa maong ulay naggikan ang itlog. Dili mahimong magkaaduna og itlog didto nga walay sensasyon, unsa ma’y buhaton sa Dios kung ingon-ana? Kita n’yo?

⁷⁰ Pareho Niyang gilalang ang itlog ug ang selulang Dugo, ug kadto mao ang tabernakulo sa Dios, balaan. “Dili Ko itugot nga ang Akong Balaan moagi sa pagkadunot.” Nakita n’yo kung asa naggikan ang itlog? “Ni pagabiyaan Ko ang Iyang kalag didto sa hades.” Balaan ang Iyang lawas! Oh, sus! Dili mo, kung dili mo matoohan kana, unsaon man nimo nga matawag ang imong kaugalingon nga usa ka Cristohanon?

⁷¹ “Giluwas kita pinaagi sa Dugo sa Dios.” Dinha nakapahimutang ang akong pagtoo. Dili nga molakaw dinha sa dugo sa usa ka propeta, dili nga molakaw dinha sa dugo sa usa ka ordinaryong tawo, o usa ka manunudlo, o usa ka teologo. Nagalakaw kita dinha sa Dugo sa Dios. Ingon niana ang sulti sa Dios. Nahimo Siya nga tawo. Gibag-o Niya ang Iyang porma. Iyang gilatag ang Iyang balongbalong dinhi, uban kanato, ug nahimong usa kanato. Siya ang atong Kabanay’ng Manunubos. Gikinahanglan Niyang mamahimong atong kabanay, tungod kay mao kana ang balaod. Ang Dios nahimong tawo ug mipuyo uban kanato.

⁷² Himatikdi kung unsa nga, sa pagbuhat niini, Siya nga naggikan Kaniya, maoy Dios, ang Espiritu, ug kana nga Espiritu mianha sa magtotoo. Busa, ang Kinabuhi nga anaa nianang atong Halad, nagakailhan kita sa nianang mao ra nga Kinabuhi.

⁷³ Kung ingon-ana unsa man nga makita nila ang Kinabuhi sa Dios nga nagapanglihok sa taliwala sa mga tawo, ug tawgon Kini nga usa ka mahugaw’ng butang, sa dihang mao man Kana ang atong pagpaila sa atong Halad? “Siya nga nagatoo Kanako, ang mga buhat nga Akong ginabuhat iya usab pagabuhaton.” Ang Iyang Kinabuhi nagabalik ngadto sa ha- . . . gikan sa Halad, sa diha nga ginapandongan nato Kini sa atong mga kamot ug ginapaila ang atong kaugalingon nga patay na diha sa atong kaugalingong mga panghunahuna. Kung ingon-ana naunsa ba nga ginatugotan man nato ang mga denominasyon nga itukmod kita ngadto sa mga kredo ug ingon-anang mga butang, ug nagaingon nga nagatoo kita Niini? Patay na kita sa nianang mga butang.

⁷⁴ Nag-ingon si Pablo, “Wala ni usa sa niining mga butang ang nakapabalaka kanako,” tungod kay nahikot siya ngadto sa usa ka piho na, nga mao si Cristo. Ug ang matag matuod nga kalampusan nakahilambigit ngadto sa usa ka piho, ug ang akong piho mao ang Pulong. Ug ang tanang uban pa, nga—nga tinuod gayud nga natawo sa Espiritu, ang piho alang kanila mao ang Pulong sa Dios. Nakahikot na ako ngadto Niini. Gipandong na nako ang akong mga kamot ibabaw Niini. Ug mipuli Kini sa akong lugar, ug ginapaila ko na ang akong kaugalingon nga uban Kaniya. Nakahibalo kita nga nagsaad Siya nga ipaila Niya ang Iyang Kaugalingon nga uban kanato. Nagahatud kana sa tinuod nga pagtoo; dili nga kaugalingon mong pagtoo, kondili Iyang pagtoo; butang nga dili ikaw ang nagakontrolar. Siya ang nagabuhat niini. Karon himatikdi. Dinha, ug dinha lamang, sa diha nga ang . . . ang saad gisaad kanimo.

⁷⁵ Bisan unsa pa ka daghan nga mga iglesia ang imo nang giapilan, bisan kapila ka na ka higayon gibautismohan; nga pakulob, pahayang, bisan unsa man nga paagi nga gusto mo. Hangtud nga kanang Selyo nabutang na diha kanimo, kung ingon-ana wala ka’y katungod nga tawgon ang imong kaugalingon ingon nga konektado sa imong Halad.

⁷⁶ Ug unsa man ang Selyo sa Dios? Mga Taga-Efeso 4:30, nagaingon, “Ayaw ninyo pagpasub-a ang Espiritu Santo sa Dios, nga diha Kaniya giselyohan kamo alang sa adlaw sa pagtubos.” Dili nga gikan sa usa ra ka rebaybal hangtud sa usa pa, kondili nga giselyohan na sa Walay Katapusan hangtud sa Adlaw nga kamo pagatubson.

⁷⁷ Ug, hinumdumi, kung kamo kaniadto pa wala diha sa mga hunahuna sa Dios, dili gayud ninyo mahimong mauban ang Dios. Pila ba kaninyo ang nakahibalo nga Siya usa ka manunubos? [Nagaingon ang kongregasyon, “Amen.”—Ed.] Bueno, kung ingon-ana, ang unsa mang butang nga gitubos kinahanglan nga magabalik ngadto sa kung asa kini kaniadto nahulog. Busa kung mianhi Siya aron nga tubuson kita, unsa man nga kita, usa ka panahon kaniadto dili kinahanglan nga pagatubson, ug kitang tanan “nangatawo sa sala, naporma diha sa kadautan, gipanganak nganhi sa kalibutan nga nagapanulti og mga bakak”? Nagapakita kini nga ang tinuod nga Cristohanon usa ka kinaiyahan sa hunahuna sa Dios, sa wala pa nagkaaduna og usa ka kalibutan, o usa ka bitoon, o hangin, o unsa pa man. Kini Walay Katapusan, ug mianhi Siya aron nga pagatubson kita pabalik. Hunahuna Kini sa Dios, nga gilitok ngadto sa usa ka pulong, naihayag ug gi- . . . gibalik ngadto sa Iyang hunahuna.

⁷⁸ Kabanay nga Manunubos! Mao kana ang hinungdan nga ang Dios Mismo gikinahanglan nga mamahimong usa kanato, aron nga magtubos. Wala na’y uban pa nga makahimo niini. Dili kini mahimo sa usa ka Manolunda, wala na’y uban pa.

Gikinahanglan Niyang monaug, pagasulayan nga sama kanato, aron matubos kita.

⁷⁹ Himatikdi karon ang natural nga binhi ni Abraham. Atong susihon ang pipila sa niadtong mga natural nga binhi, ug tanawon kung gituman ba sa Dios ang Iyang Pulong ngadto sa natural nga binhi, nga mao si Isaac kaniadto. Atong susihon ang pipila sa mga natural nga binhi nga mitoo sa bug-os nga saad sa Dios ug wala nagduhaduha. Karon hinumdumi, adunay napulo ka libo ka mga linibo ka pilôpilôon nga linibo ang nasirkunsisyon ug tanang uban pa, ug dili sa gihapon Binhi ni Abraham. Sigurado, “Kanang Judio nga sa gawas lamang dili Judio; kondili kanang Judio nga sa kinasuloran.” Sila, daghan kanila, ang nangapakyas, mapait nga nangapakyas.

⁸⁰ Tan-awa, didto sa kamingawan, nanag-ingon sila, “Kami. . .” Niadtong adlaw sa Fiesta sa Pasko, o niadtong pag-inom didto sa tuburan, San Juan 6. Nagkasadya silang tanan niadto.

⁸¹ Nag-ingon si Jesus, “Ako mao kadtong Bato didto sa kamingawan. Ako mao ang Tinapay nga miabot gikan sa Dios, gikan sa Langit, kung mokaon ang tawo niini ug dili mamatay.”

⁸² Nanag-ingon sila, “Ang among mga ginikanan nanagpangaon sa manna didto sa kamingawan, sulod sa kuwarenta ka tuig.”

 Miingon Siya, “Ug sila, ang matag-usa kanila, nangamatay.”

⁸³ *Namatay*, kuhaa kana nga pulong ug susiha kana, tan-awa kung unsay kahulogan niana, “Walay Katapusan nga nahimulag.” Bisan pa niana, mga binhi sila ni Abraham. Ang *kamatayon* nagakahulogan og “pagkahimulag, pagkahanaw, bug-os nga pagkapapas, pagkahanaw.” Nag-ingon si Jesus nga nangamatay sila, ang matag usa kanila, bisan pa nga mga Judio sila nga nasirkunsisyon.

⁸⁴ Kita n’yo, makalulooy nga mga tawo, tungod lamang nga kita’y mga Methodist, Baptist, Presbyterian, adunay gagmay’ng mga pagpahayag, ug mga butang nga sama niana; nagatoo usab ang yawa kung unsa kita ka ingon nga nagatoo.

⁸⁵ Apan kinahanglan nga mailhan kang kauban Niini. Kinahanglan nga Kini mapamatud-an sa Dios diha niini, pinaagi sa pagkaselyo diha sa Balaang Espiritu. Walay pagpangduhaduha sa Pulong!

⁸⁶ Kung moingon ka, “Bueno, karon, alang man kana sa uban pa nga panahon,” adunay butang nga sayup.

⁸⁷ Unsa kaha kung adunay tawo nga paanhi nga nagadagan, ug giingnan mo siya nga nagasidlak na ang kahayag, ug midagan siya ngadto sa ilalum sa balay, miingon, “Basta ayaw ko niini. Basta ayaw ko niini. Wala ma’y ingon niana nga butang sama sa kahayag. Wala ako nagatoo niini”? Aduna gyu’y butang nga

sayup nianang tawhana. May sakit siya sa hunahuna. Kung ginabalibaran niya ang mainit nga sidlak niini ug ang mahimo niini sa paghatag og kinabuhi, aduna gyu'y butang nga sayup kaniya, sa pangutok.

⁸⁸ Ug sa diha nga ang usa ka tawo nakita na ang Pulong sa Dios, nga napatin-aw sa atubangan niya, ug napaila gayud, ug dayon isarado ug birahon paubos ang denominasyonhon niyang mga tabil, aduna gyu'y sayup nga butang nianang tawhana, sa espirituhanon. May butang nga sayup kaniya. May sayup nga butang espirituwal. Dili niya gayud mahimong dawaton Kini. “Buta, ug wala nahibalo niini,” nga paingon sa Paghukom, ug ang Dios ang maghuhukom.

⁸⁹ Himatikdi sa diha nga ilang—ilang gibuhat kini, ug kining mga binhi karon nga nanagtoo Niini, bantayi kung unsay nahitabo. Atong susihon ang pipila kanila karon, sa mga binhi ni Abraham.

⁹⁰ Atong hisgotan ang mga batang Hebreohanon, tungod kay nanagbarug sila nga matinud-anon ug wala giuyonan ang pagsimba sa larawan. Nagbalibad sila sa pagyukbo ngadto sa usa ka larawan nga gihimo sa hari sa maong nasud. Gihimo kadto ingon nga larawan sa usa ka balaan nga tawo, usab, ang larawan ni Daniel.

⁹¹ Nagpakita kadto nga ang Gentil nga kaliwat nahipasulod ilalum sa sayup nga dapit, ang pagsimba sa usa ka larawan sa usa ka balaan nga tawo. Nagatapus kini sa mao gihapon nga paagi, sa diha nga igapamugos ngadto sa mga tawo ang pagsimba sa mga larawan sa mga tawo. Miabot kini tungod sa kapadayagan, ni Daniel ingon nga mahimo niyang hubaron ang Pulong, nga atua nahisulat sa maong sinulat-sa-kamot didto sa bongbong. Sa ingon niana kini misulod, ug sa ingon niana kini nagagawas, sa mao rang paagi, sa larawan sa Gentil.

⁹² Himatikdi, ayaw nila buhaton kini. Ug unsay ilang gibuhat? Mga binhi sila ni Abraham nga nagpabilin nga matinud-anon sa Pulong, ug ilang gipanag-iyahan ang ganghaan sa kaaway, ang kalayo. Ila kadtong gibuhat. Bueno, ang Pulong sa Dios matuod.

⁹³ Si Daniel, gisulayan tungod sa pagsimba sa usa ra ka matuod nga Dios. Gisulayan siya tungod niana. Ug sa panahon sa pagsulay, nalabang niya ang maong pagsulay. Ug unsay gibuhat sa Dios, human nga daw sa anaa na siya sa kritikal nga kahimtang, kung sa ato pa? Ug wala sila nahibalo kung unsay buhaton. Ilang igapakaon siya kaniadto ngadto sa leon. Apan nagpabilin si Daniel nga matinud-anon sa maong pagsulay, nga adunay usa ra ka matuod nga Dios, ug iyang gipanag-iya ang ganghaan sa iyang kaaway. Gisirado sa Dios ang baba sa leon.

⁹⁴ Nagpabilin si Moises nga matinud-anon sa gisaad nga pulong, diha sa atubangan sa mga manunundog, si Jambres ug si Jannes, dinha sa pagsulay. Tan-awa, gitagbo siya sa Dios,

sa supernatural, giingnan siya nga buhaton niya kini nga mga butanga, igapakita kini nga mga ilhanan, ug ang matag ilhanan magkaaduna og tingog. Miadto mismo si Moises, sa ingon ka matinud-anon nga mahimo niya. Gibalibag niya ang sungkod, ug nahimo kini nga usa ka bitin. Kabalo ba mo kung unsay nahitabo? Ania miabot ang mga manunundog ug gibuhat ang mao ra mismong butang.

⁹⁵ Karon, wala ni Moises gipataas ang iyang mga kamot, nga nagaingon, “Bueno, siguro sayup gyud kini tanan.” Mipabilin siya didto ug naghulat sa Dios. Nagpabilin siya nga matinud-anon. Bisan unsa pa ka daghang mga manunundog didto, nagpabilin siya nga matinud-anon. Ug sa diha nga nagpabilin siya nga matinud-anon sa iyang pagkasinugo, aron nga dalhon pagawas kadtong mga tawo gikan niadtong lugara. Sa diha nga ang ganghaan nga tubig mibabag sa iyang dalan, gitugotan siya sa Dios nga panag-iyahon kadto, ug Iyang gibuksan ang mao nga ganghaan pinaagi sa Haligi nga Kalayo nga mao kaniadto ang nagapanguna kanila. Iyang padayon nga gidala ang mga tawo paingon sa yutang saad.

⁹⁶ Si Josue, usa pa ka halangdon nga pangulo. Duha lamang sa . . . ang nakasulod sa yutang saad, si Josue ug si Caleb. Miabot sila kaniadto sa usa ka lugar nga gitawag og Kadesh, nga mao ang sentro sa kalibutan niadtong panahona, ingon nga mao kaniadto ang kaulohan sa paghukom. Ug, oh, nagpadala sila og dose ka mga tigpaniid aron tan-awon ang maong yuta, ug dose sa ila ang mibalik.

⁹⁷ Miingon ang napulo kanila, “Oh, malisud kaayo kini nga trabaho. Dili gayud nato kini mahimo. Bueno, kadto nga mga tawo, daw ingon sa mga dulon lamang kita diha sa kilid nila.”

⁹⁸ Apan unsay gibuhat ni Josue? Iyang gipahilum ang maong mga tawo. Miingon siya, “Kadyut lang. May kasarang gayud kita nga sakupon kini, bisan unsa pa kita ka gamay, o bisan unsa pa kita ka diyutay.” Unsa ma’y iyang ginabuhat? Nagabarug siyang matinud-anon ngadto nga saad, “Ihatag Ko kini nga yuta kaninyo,” apan kinahanglan ninyong pakig-awayan ang matag pulgada niini.

⁹⁹ Ginatoohan mo ba kana, nanay? Gihatag na sa Dios kanimo ang imong pagkaayo, apan kinahanglan mong pakig-awayan ang matag pulgada niini. “Ang tanan nga dapit nga pagatumban sa lapalapa sa inyong mga tiil, ginahatag Ko kana kaninyo ingon nga inyong panag-iyas.” Ang *mga-agi-sa-tiil* nagakahulogan og “panag-iyas.” Sa imo na kini tanan, para kanimo ang matag saad, apan pagapakig-awayan mo karon ang matag pulgada sa maong dalan pasulod.

¹⁰⁰ Karon, nasayod si Josue kung unsa ang giingon sa Dios. Usa siya ka binhi ni Abraham. Kita n’yo? Miingon siya, “Ginatoohan ko kana, nga gihatag sa Dios ang mao nga yuta, ug mas may

kasarang kita aron sakupon kini.” Ug tungod kay nalabang niya ang pagsulay, batok sa tibuok panon sa mga Israelinhon, ang tanan nga banay ug ang tanan nga mga tawo miagulo na ug nanghilak. Miingon si Josue, “Manghilum kamo! Nagsaad na ang Dios.”

¹⁰¹ Bisan unsa ka pa ka daku, ug unsa man ang nagababag, ug unsa man ang giingon sa doktor, nagsaad ang Dios. Bahala na ang Dios sa pagbuhat niini.

¹⁰² Unsa man ang gibuhat ni Josue? Pag-abot niya didto sa suba sa Jordan, iyang gipanag-iyahan ang maong ganghaan. Ingon niana ang iyang—iyang gibuhat.

¹⁰³ Ang Jericho, ingon ka sarado nga sama sa usa ka bao sulod sa kabhang niini. Unsay iyang gibuhat? Iyang gipanag-iyahan ang maong ganghaan.

¹⁰⁴ Bisan usa niadto ka adlaw sa diha nga naninguha ang iyang kaaway nga lupigon siya, ingon ka grabe niyang gipanag-iyahan ang ganghaan sa iyang kaaway nga iyang gisugo ang adlaw sa paghunong. Ug mituman kaniya ang adlaw, ug wala gayud milihok sulod sa baynte-kuwatro ka oras.

¹⁰⁵ Matinud-anon ang Dios sa Iyang saad, bisan unsa pa ang gikinahanglan Niyang buhaton; mabangkaruta man ang Langit dili Niya gayud mahitugotan nga mabuntog ang Iyang Pulong. Wala gayud Siya sukad nagsaad nga dili Niya matuman. “Ako ang Ginoo nga nagaayo sa tanan mong mga balatian. Kung pandongan nila sa ilang mga kamot ang mga masakiton, mangaayo sila.” Amen. “Kung ikaw makahimo sa pagtoo, ang tanang mga butang mahimo.”

¹⁰⁶ Gitoohan kini ni Josue, bisan pa nga gikinahanglan sa Dios nga pahunongon ang kalibutan sa pagtuyok. Gipahunong kini didto pinaagi sa kung unsa nga uban pa nga Gahum, sa Kaugalingon Niyang gahum; nga ang kalibutan wala gayud mituyok sulod sa baynte-kuwatro ka oras, hangtud nga naipanimalus ni Josue ang iyang kaugalingon ngadto sa iyang kaaway. Iyang gipanag-iya ang maong mga ganghaan. Siguradong, iya gayud gibuhat. Matinud-anon gayud ang Dios sa tanang panahon.

¹⁰⁷ Hinaut ko nga aduna pa kita unta og oras nga mahisgotan ang dugang pa nga mga bayani, apan aduna na lang ko og napulo ka minuto karon. Tan-awa, ang tanan niining bililhon nga mga bayani, ingon nga kung unsa sila kaniadto, ug halangdon nga mga manggugubat sa pagtoo, nangamatay silang tanan diha sa ganghaan sa kamatayon. Nangamatay silang tanan, mismo dinha sa ganghaan sa kamatayon.

¹⁰⁸ Dayon ania na miabot ang Harianong Binhi ni Abraham. Silang tanan kaniadto mga natural nga binhi, gikan kang Isaac. Apan ania ang Harianong Binhi ni Abraham, nga mao si Cristo, ang Binhi ni Abraham sa pagtoo; kung unsa unta kita, tan-awon

na lang kung kita ba mao gayud o dili. Ang natural nga binhi usa lamang ka tipo. Ang tanang uban pa natawo diha sa natural nga pagkahimugso, apan Siya natawo pinaagi sa usa ka ulay. Kita n'yo, dili kadto binhi ni Abraham, kung ingon niana, ang Judio. Mianhi Siya pinaagi sa binhi sa pagtoo sa saad. Ug, kung ingon-ana, kita'y mga anak Niya, pinaagi niining Tawhana.

¹⁰⁹ Tan-awa kung unsa ang Iyang gibuhat. Sa dihang ania Siya sa yuta, Iyang gibuntog ug gipanag-iyahan ang matag ganghaan nga aduna ang kaaway; ang maong Harianong Binhi. Iyang gisaad kini pinaagi sa Pulong. Iyang gibuntog kini. Iyang gibuntog ang ganghaan sa balatian, alang kanato. Mao kana kung unsa ang Iyang gianhi aron buhaton. Siya, hinumdumi, mga tawong masakiton, Iya nang gibuntog kana nga ganghaan. Dili mo na kinahanglan pang buntogon kini; Iya nang gibuntog kini. Kinahanglan pang buntogon sa ubang mga tawo ang kaugalingon nilang ganghaan. Apan dili mo na kinahanglan pa nga mangbuntog; nabuntog na kini. Iya nang gibuntog ang mga ganghaan sa balatian. Ug unsay Iyang gibuhat sa diha nga Iyang gibuntog ang mga ganghaan sa balatian, nga nagaingon nga Iya gayud pagabuhaton? "Unsa man ang inyong pagahangyoon dinhi sa yuta, ug unsa man ang inyong gibugkos sa yuta, pagabugkuson Niya kini sa Langit," ginahatag kanato ang mga yawi sa ganghaan.

¹¹⁰ Iyang gibuntog ang ganghaan sa panulay, pinaagi sa Pulong. Ug ang mga yawi maoy, "Sukli ninyo ang kaaway, ug siya mokalagiw gikan kaninyo." Iya nang gibuntog kini tanan; gibuntog na ang matag balatian.

¹¹¹ Iyang gibuntog ang kamatayon, ug Iya nang gibuntog ang impiyerno. Iyang gibuntog ang kamatayon ug ang impiyerno. Iyang gibuntog ang dili mabuntog sa uban, tungod kay sila mga natural nga binhi. Kini mao ang Binhi nga espirituwal. Iyang gibuntog ang ganghaan sa lubnganan, ug nabanhaw sa ikatulo nga adlaw, alang sa pagpamatarung kanato.

¹¹² "Ug karon labaw pa kita ka mga mananaug." Manglakaw lang kita pasulod niini, ingon nga usa ka panulondon, "Labaw pa ka mga mananaug." Karon nagapakig-atubang kita sa usa ka gibuntog na nga kaaway. Gibuntog na ang balatian. Gibuntog na ang kamatayon. Gibuntog na ang impiyerno. Ang tanan gibuntog na. Oh, sus! Hinaut ko nga doble unta ang kadakuon ko, karon ingon ka doble ka maayo ang ginabati ko. Nagapakig-away kita sa usa ka gibuntog na nga kaaway.

¹¹³ Dili ikatingala nga makasulti si Pablo, sa diha nga nagahimo na sila kaniadto og usa ka punggutanan, nga pangputol sa iyang ulo, miingon siya, "Oh kamatayon, hain na ang imong ikot? Ipakita kanako kung asa mo ako mapalimbaglimbag ug mapasiyagit. Lubnganan, hain na ang imong pagdaug, ug nagadahum ka ba nga mapaagup-upan mo ako dinha? Itudlo

ko ikaw ngadto sa usa ka wala nay sulod nga lubnganan didto; ug ako'y anaa na diha Kaniya, pagabanhawon Niya ako sa kaulahiing adlaw." Usa gayud ka gibuntog na nga kaaway!

114 Ang Harianong Binhi ni Abraham! Karon, ang natural nga binhi dili makapahinungod ngadto Niana. Apan makapangdaug ang Harianong Binhi, human na nakapangdaug, tungod kay nag-una na Siya kanato ug gibuntog na ang matag ganghaan alang kanato. Siya sa karon, human sa duha ka libo ka tuig, ania Siya nga nagatindog sa taliwala kanato, ang gamhanang Mananaug. Dili lamang nga gibuntog Niya ang balatian. . . Gibuntog Niya ang balatian. Gibuntog Niya ang panulay. Gibuntog Niya ang matag kaaway. Gibuntog Niya ang kamatayon. Gibuntog Niya ang impiyerno. Gibuntog Niya ang lubnganan, ug nabanhaw. Ug duha ka libo ka tuig human niadto, ania Siya nga nagatindog sa taliwala kanato, karon nga hapon, nga ginapaila ang Iyang Kaugalingon, nga mao ang gamhanang Mananaug! Amen. Ania Siya sa gihapon, nga buhi, ginapanghimatud-an ang Iyang saad, ang Harianong Binhi ni Abraham! Oh, sus! Ug ang kaaway. . .

115 "Iyang pagabuntogon ang mga ganghaan sa iyang kaaway." Sa kadtong mga, Binhi, ania Siya nga nagatindog nga buhi aron nga panghimatud-an ang Iyang Kaugalingon ngadto sa kang kinsa man? Sa kadtong mga predestinado nga mga Binhi nga makakita niini. Iya nang gibuntog kana. Nga kinsay, human sa pagsulay niini, mahitungod sa saad sa Pulong, giselyohan sila sa Espiritu Santo, pasulod ngadto sa Lawas ni Cristo, ngadto kanila gipanghimatud-an (ang unsa?) ang Mga Hebreohanon 13:8 nga mamaingon niana. Giselyohan sila dinha pinaagi sa Espiritu Santo, niadtong Espiritu Santo nga pinaagi sa. . . Nakita na kini daan ni Abraham; pinaagi sa pagtoo gitooohan niya kini. Ug karon atong ginadawat Kini, nga nagalantaw balik ngadto sa saad sa kung unsay Iyang giingon. Ug gipanghimatud-an ang Juan 14:12 sa niining kaulahiing mga adlaw, sa nabanhaw nga Mananaug, Mismo.

116 Dili sa kung unsa nga sistema; kondili sa usa ka Persona, si Cristo, nga Mananaug. Dili sa akong iglesia, dili sa Baptist ko nga iglesia, o sa inyong Presbyterian, Methodist, o Pentecostal, dili sa ingon niana; kondili pinaagi kang Jesus Cristo. Buhi Siya sa karon. Nabanhaw Siya nga labaw niana, alang sa pagpamatarung kanato.

117 Ug tungod kay Siya buhi, nag-ingon Siya nga kita mangabuhi usab. "Ang Tawo dili mabuhi sa tinapay lamang, kondili sa matag Pulong," dili nga bahin lang sa Pulong, "matag Pulong nga nagagula sa baba sa Dios." "Ako mao ang Pagkabanhaw ug ang Kinabuhi. Ang nagatoo Kanako, bisan siya namatay, mabuhi siya. Ang tanan nga buhi ug nagatoo Kanako dili na gayud mamatay. Nagatoo ka ba niini?" Sakupon ninyo ang ganghaan sa matag kaaway!

¹¹⁸ Unsaon man niya pagbuntog kang Bosworth, sa dihang ang Dios. . . Anaa na si Bosworth sa Mananaug. Ug mao kana ang hinungdan nga miingon siya, “Ang pinakamalipayon nga takna sa akong kinabuhi maoy mismo karon.” Uh-huh. Nakaila siya nianang Gamhanang Mananaug. Nagsandig ang iyang kasiguradohan diha Kaniya. Oh, sus! Karon makakanta na kita’g:

Sa dihang buhi, gihigugma Niya ako; sa
pagkamatay, giluwag Niya ako;
Sa pagkalubong, gidala Niya ang akong mga
kasal-anan palayo;
Sa pagbangon, walay bayad nga gipamatarung
ako ngadto sa walay katapusan;
Moabot Siya sa umalabot, Oh
pagkamahimayaong adlaw!

¹¹⁹ Ngadto sa mga daw sa nabuntog na. Si Eddy Perronet, siya siguro kadto, dili niya mabaligya kaniadto ang iyang mga alawitong Cristohanon. Walay ni usa ang may gusto sa mga niini. Ayaw nilang may kahilambigitan niini. Oh, nabuntog, ug usa ka magtotoo! Usa niana ka adlaw, mikanaug kaniya ang Balaang Espiritu. Ang ganghaan sa iyang kaaway, ayaw dawaton niadto ang iyang mga literatura! Miabot kaniya ang Espiritu, ug mikuha siya og usa ka pangsulat, gipahanugot kaniya sa Dios nga isulat ang kanta pang-inugurasyon.

Bug-os nga itimbaya ang gahum sa Ngalan ni
Jesus!
Manggiyukbo ang mga Manolunda;
Dalhon ang purongpurong,
Ug purongpurongan Siyang Ginoo sa tanan.

¹²⁰ Ang buta nga si Fanny Crosby, usa ka higayon niadto. Miingon, “Unsa ma’y kahulogan niini para kanimo?” Ang uban. . . Wala niya gibaligya ang iyang pagkapanganay sama sa gihimo sa Pentecostal nga si Elvis Presley, o sama sa gihimo sa church-of-Christ nga si Boone, o sama sa gihimo ni Red Folley, nga ginabaligya ang ilang mga talento ngadto sa kalibutan; aduna sila’y pinanon nga mga Cadillac, ug minilyon ka mga dolyares, mga ganting bulawan sa pagbaligya’g mga plaka. Apan si Fanny Crosby nagpabilin nga matitud-anon sa iyang puwesto. Misinggit siyang:

Ayaw ako’g labyi, Oh maloloy-on nga
Manluluwas,
Dungga ang mapainubsanon kong pagtuaw;
Samtang nga nagapanawag Ka sa uban,
Ayaw ako pagalabyi.
Ikaw nga mao ang Sapa sa tanan kong mga
kahupayan,
Labaw pa sa kinabuhi alang kanako,

Kinsa pa man ang dalangpanan ko gawas
Kanimo?

O kinsa man sa Langit kondili Ikaw?

¹²¹ Miingon sila, “Unsa kaha kung buta ka pag-abot mo sa Langit?”

Miingon siya, “Mailhan ko Siya, sa gihapon.”

Miingon, “Unsaon mo man pagkaila Kaniya?”

Miingon, “Mailhan ko Siya.”

Miingon, “Mrs. Crosby, makapanguwarta ka pa baya og usa ka milyon ka dolyares.”

Miingon siya, “Wala ko nanginahanglan og milyon ka dolyares.”

¹²² “Unsaon mo man diay pagkaila Kaniya?” Miingon siya:

Mailhan ko Siya, mailhan ko Siya,

Ug magatindog ako sa Iyang kilid ingon nga gitubos;

Mailhan ko Siya, mailhan ko Siya.

¹²³ “Kung dili ako makakita Kaniya, ako man mahikap ang mga marka sa lansang diha sa Iyang mga kamot.” Iyang gipang-iyahan ang ganghaan sa iyang kaaway. Oo.

¹²⁴ Kung anaa na kamo kang Cristo! Miingon Siya, “Kung kamo nagapabilin Kanako, ug ang Akong Pulong nagapabilin Kaninyo; managpangayo kamo kung unsa man nga yawi ang gusto ninyo, managpangayo kamo kung unsa man nga ganghaan ang inyong pagapanag-iyahon; managpangayo kamo sa unsa man nga buot ninyo, ug igahatag kini kaninyo. Kung nagapabilin kamo Kanako, ug ang Akong Pulong nagapabilin diha kaninyo, mahimo ninyong pagapanag-iyahon ang unsa man nga ganghaan sa kaaway nga nagababag sa atubangan ninyo.” Mga harianong Binhi kamo ni Abraham.

¹²⁵ Unsa man diay nga matang sa ganghaan ang nagababag sa atubangan mo? Kung balatian man kini, labaw pa ikaw ka mananaug niini. Kung ingon-ana mahimo natong isulti, ikanta kining mapanalanginong karaan na nga kanta:

Matag saad sa Libro ako,

Matag kapitulo, matag bersekulo...ug

Balaanon gayud,

Nagasalig ako diha sa Iyang Balaanong gugma.

Kay ang matag saad diha sa maong Libro akoa.

¹²⁶ Labaw pa kita ka mga mananaug, ug ang Binhi ni Abraham magapanag-iyahon sa ganghaan sa kaaway! Sa dihang moingon sila nga dili mahimong mahitabo kining mga Butanga, pag gusto nilang tawgon Kini nga usa ka yawa, o Beelzebub man, o unsa pa man, siguradong pagabuntogon sa Dios ang matag ganghaan ug pagalupigon ang kaaway.

Magaampo kita.

¹²⁷ Ginoo, hinaut nga ang Binhi ni Abraham . . . Kabalo ako nga makita nila Kini, Ginoo. Unsaon man pagkahulog nianang Pulonga nga dili moabot nianang tinuod nga Yuta? Nagaampo ako nga masabtan gayud nila karon. Hinaut nga ang matag tawong moduol diha sa linya sa pagpaampo mamaayo.

¹²⁸ Ginoo, kung aduna man sa gihapon og pipila dinhi, nga wala pa sila nakapagpahayag, wala pa sa dayag nga mibarug ug mibarug alang kang Cristo, nga andam isalikway ang tanang mga kredo ug ang mabugnaw, pormal, patay na nga mga butang nga nagpahilayo kanila gikan Kanimó. Ug hinaut nga mangbarug sila karon, ug manag-ingon, “Dawatón ko Siya ingon nga akong Manluluwas.” Kung ingon-ana magabarug Ka alang kanila nianang Adlawá.

¹²⁹ Samtang nga nanagduko ang atong mga ulo, kung aduna ma’y gustong motindog sa makadiyut, alang sa pag-ampo, moingon, “Gusto kong mobarug alang Kaniya karon, aron nga mobarug Siya alang kanako nianang Adlawá, didto sa Iyang Balaanong Presensiya.” Ginahangyo ko kamo, ug ginahatagan kamo og kahigayonan nga mahibutang ang inyong ngalan diha sa Libro sa Kinabuhi, kung mobarug ikaw. Wala ta ka ginahangyo nga moapil sa unsa man nga iglesia. Ginahangyo ko ikaw nga moduol kang Cristo, kung ikaw man ania ug wala nakaila Kaniya.

¹³⁰ Panalanginan ka sa Dios, anak. Aduna pa ba, nagaingon, “Ako—gusto kong mobarug karon.” Panalanginan ka sa Dios, gining. Panalanginan ka sa Dios, igsoon kong babaye. “Gusto kong . . .” Panalanginan ka sa Dios. Panalanginan ka sa Dios. “Ako’y nagabarug, niining hapon.” Kining maayo kaayong mga tawo, mga kalalaken-an ug mga kababayen-an, nga nanagbarug, “Ako’y magabarug, karon nga hapon.”

¹³¹ Ug sa nianang adlaw pag ang doktor nagaingon na, “Bueno, ang kadaut; nagaagas na ang iyang dugo, anaa na ang kamatayon sa maong lalaki, o sa maong babaye.” O, usa ka buntag, mahinumduman mo nga nagabarug ka. Magabarug ka alang Kaniya karon.

¹³² “Kung magakaulaw ka tungod Kanako sa atubangan sa tawo, igakaulaw Ko ikaw sa atubangan sa Akong Amahan ug sa balaang mga Manolunda. Apan kung igasugid mo Ako sa atubangan sa tawo, siya’y igasugid Ko sa atubangan sa Akong Amahan ug sa balaang mga Manolunda.”

¹³³ Pagapanalanginan ka, igsoon kong babaye. Aduna pa ba’y uban diha sa balkonahe kung asa man? Karon mismo, samtang nga nagahulat kita. Ang uban kanila, aduna pa ba dinha sa unang andana? Sige. Saligan ko ikaw sa imong pulong, higala.

¹³⁴ Pag mahulog ang Pulong diha sa mabinhion nga Yuta, sama sa luoy’ng babaye didto sa atabay, siya—nasabtan niya.

Girepresentar siya didto sa Langit, sukad pa sa pagka-. . .sa wala pa ang pagkatukod sa kalibutan. Sa diha nga nasidlakan Kadto sa Kahayag, naila niya Kadto.

¹³⁵ Pagapanalanginan ka sa Dios, igsoon kong lalaki. Usa kana ka maisogong. . .Pagapanalanginan ka sa Dios, igsoon kong lalaki. Mahimong nakahimo ka na og dagkung mga butang sa imong kinabuhi; ginahimo mo karon ang pinakahalangdon nga butang nga wala mo sukad nahimo, karon lang, ang magbarug alang kang Cristo.

¹³⁶ Langitnon namong Amahan, ang binhi nahulog na ngadto sa pipila ka yuta, niining hapon. Makita namong nagagitib na ang Kinabuhi. Mga kalalaken-an ug mga kababayen-an nga nanagtindog, ug ang mata sa Dios nga makakita sa tanan, Nga anaa sa tanang dapit, nasayod sa tanan, makagagahum sa tanan, nakita sila. Imoha sila, Amahan. Ako silang ginapresentar Kanimo karon, ingon nga mga tropeo.

¹³⁷ Hinaut nga kining kasinatian nila nga nanagtindog dinha karon, nga nasayod kung unsay ilang ginabuhay, nasayod kung unsay kahulogan niini, nga sila nanagtindog aron nga magbarug uban sa diyutay'ng mga tinamay nga iya sa Ginoo. Hinaut nga hangtud-hangtud silang magapabilin nga matitud-anon hangtud nianang Adlaw nga magatindog sila diha sa Imong Atubangan, dayon mosulti kanang makalilipay nga Tingog, "Oo, usa niadto ka adlaw didto sa Baton Rouge, o sa usa ka lugar nga gitawag og Denham Springs, mibarug siya alang Kanako, Amahan, karon magabarug Ako alang sa maong lalaki, o sa maong babaye." Itugot kini, Ginoo. Imoha sila, sa Ngalan ni Jesus. Amen.

Pagapanalanginan kamo sa Dios, tungod sa inyong pagbarug. Ang Dios gayud. . .

¹³⁸ Karon buhata ninyo kining usa ka butang alang kanako. Mangita kamo, kung atua man mo sa kung asa dapita kini nga mga pastor, pagpakigkita mo sa pipila kanila, pagpakig-istorya kanila. Kung wala pa kamo nabautismuhan, diha sa Cristohanong bautismo, buhata kini. Magpakigkuyog ngadto sa mga magtotoo karon, sa tinuod nga mga magtotoo, dili sa mga nagapatoo-too lang; sa mga tinuod gayud nga mga magtotoo.

Samtang nga nagaampo kita, iampo nato kining mga panyo.

¹³⁹ Langitnong Amahan, kini nga mga panyo nagapaadto na karon; sa kung asa man, wala ako nakahibalo. Tingali ngadto sa kung kinsa nga buta og tigulang na nga amahan nga nagalingkod didto sa usa ka gamay nga kalapokan kung asa man, nga nagahulat nga moabot kini nga panyo; usa ka gamay'ng masuso nga naghigda didto sa higdaanan sa ospital; usa ka inahan nga nagatindog, nga nataranta na, nagahulat sa pagbalik sa mao nga panyo. Langitnong Amahan, nagaampo ako nga ubanan Mo ang mga niini. Ug ingon nga usa ka timaan sa Imong Presensiya

karon, ug sa among pagtoo diha Kanimo ingon nga giwali na namo ang Imong Pulong, hinaut nga ang pagtoo nga atua kang Abraham, ug ang pagtoo nga gipamunga ug gihatag ni Jesus Cristo kanamo, hinaut nga moadto kini uban sa niining mga panyo ug pagaayohon ang matag usa nga mapandongan niini. Amo kining ginapadala, sa Ngalan ni Jesus. Amen.

¹⁴⁰ Karon sa makadiyut lang, sa dili pa kita magtawag og linya sa pagpaampo. Ang makagagahum sa tanan ug gamhanang Dios, ang Maong halangdon, ang Maong madagayaon sa tanan. . . Kung mahimo, mga higala, ako—pagasugdan ko na ang pagpaampo alang sa mga masakiton, ug akong. . . Siguro, pagkanaug namo, ako—dili na ako tingali makasulti og unsa man kaninyo; ang uban kaninyo tingali molakaw na sa dili pa kanang higayona. Bisan unsa pa man mo, kung wala man kamo mitindog, kaganina, ug dili ka sigurado. . .

¹⁴¹ Kung miyembro ikaw sa usa ka iglesia, maayo man kana nga butang, apan dili kana igo. Kita n'yo, ang dato nga batan-ong magmamando kaniadto usa ka miyembro sa iglesia. Kita n'yo? Gipangutana niya si Jesus kung unsa ba ang iyang buhaton aron maangkon ang Kinabuhing Walay Katapusan. Wala gayud niya gidawat Kadto. Mipahilayo siya. Daw sa unsa ka binuang nga butang nga buhaton sa usa ka batan-on nga lalaki. Ayaw gayud pilia ang iyang lugar. Nahinumduman n'yo ba ang ulahing higayon nga gihisgotan siya? Wala magdugay human niadto, miuswag siya. Nagkadato siya. Miadto siya sa punto nga bisan ang iyang mga bodega nag-awas-awas na. Apan pagkahuman niadto makita nato ang kaulahiang paghisgot bahin kaniya, didto na sa impiyerno, sa kalayong nagpasakit. Ayaw, ayaw gayud tugoti nga mahitabo kana diha kaninyo. Dawata si Cristo.

¹⁴² Kamong mga batan-on pa, kamong mga dalaga, mga batan-ong lalaki, nga bag-o lang nanghamtong, palihog buhata kana. Patalinghugi ako, ingon—ingon nga inyong igsoon, usa nga nagmahal kaninyo. Ania ako tungod nga nahigugma ako kaninyo. Gihigugma ko ang Dios, ug gihigugma ko kamo, ug dili mahimo nga higugmaon ko ang Dios kung wala ko kamo gihigugma.

¹⁴³ Mas gustohon ko pa gani, kung aduna man mo'y komento nga ipadangat, ipadangat kini ngadto sa anak kong lalaki dinha, o sa usa sa akong mga anak. Tugoti lang akong. . . Ako, puede ako nga wala og ingon niini. Buhaton kana ni bisan kinsa man nga ginikanan; mao usab ang Dios. Kita n'yo? Higugmaa ang Iyang katawhan. Higugmaa ninyo ang usa'g usa.

¹⁴⁴ Moingon mo, “Para sa unsa mo man diay sila ginakasab-an?” Ang tinuod nga gugma nagapanul-id.

¹⁴⁵ Kung ang imong anak atua nagalingkod sa dalan; moingon ka, “Bueno, atua nagalingkod si Junior. Dili niya angay buhaton kana, apan dili ko gustong mapasakitan ang gamay niyang

pagbati.” Wala mo siya gihigugma. Mamatay gayud siya dinha. Kung gihigugma mo siya, dalhon mo siya pasulod ug lapakon siya. Ipatuman mo gayud siya.

¹⁴⁶ Ingon niana ang ginabuhat sa Dios. Nagapanul-id ang gugma, ug tinuod kana nga gugma.

¹⁴⁷ Pagmotindog ang magwawali ug ginatugotan kamong mga kababayen-an nga putlon ang inyong buhok, ug nga magmeykap ug ingon-anang mga butang, ug wala kamo ginatul-id, walay tinuod nga gugma dinha; ug nga dili kini sawayon. Ug tugotan kamong mga kalalaken-an nga magminyo og tulo o upat ka higayon, ug tanan niining uban pang mga butang, ug palutson kini, walay tinuod nga gugma dinha. Ipamiyembro kamo sa usa ka simbahan, ug pikpik-pikpikon kamo sa likod, ug tuukon kamo pinaagi sa kung unsa nga kredo, dayon, “Mao lang kana ang kinahanglan mong buhaton, ang pagpamiyembro sa balaang iglesia,” walay gugma sa ingon niana. O, mahimo nga, ang maong tawo tuman gayud ka nahisalaag na, mismo, nga dili niya makita.

¹⁴⁸ Ang tinuod nga gugma nagapanul-id, ug ginabalik kamo ngadto sa Pulong sa Dios.

¹⁴⁹ Tan-awa si Jesus, unsa nga, ang giingon Niya, tungod kay gihigugma Niya sila, sa hilabihan nga namatay Siya nga puli sa ilang lugar, sa diha nga nanawagan pa gani sila para sa Iyang Dugo.

¹⁵⁰ Karon hinaut nga ang gamhanang Balaang Espiritu... Gusto kong maghulat sa kadali na lang. Nagahulat lang ako hangtud nga ang dihog sa Balaang Espiritu nagaabot na kanako, sa dili pa kita magsugod. Nagwali na ako. Salamat, sa inyong pagduyog.

¹⁵¹ Karon, ang matag usa dinhi, kung asa man kamo, kung asa man sulod sa bilding, mag-ampo lang sa makadali, ingna, “Ginoong Jesus, tabangi ako! Tabangi ako! Tugoting mahikap ko ang Imong bisti.” Nag-ingon si Jesus, kabalo mo, sa diha nga gihikap sa babaye ang Iyang bisti, wala Niya kini nabati, sa pisikal, apan milingi Siya ug naila kung kinsa siya ug unsay iyang gibuhat. Siya ang mao sa gihapon nga Jesus niining hapon, usa ka Labaw’ng Sacerdote nga arang matandog sa pagbati sa atong kaluyahon.

¹⁵² Nagatoo ba kamo, ang matag usa kaninyo karon, nga matuod kini, nga ang Dios nga naghatag niining saad, sa makausa pa (ug hinaut nga igapakita Niya kini) nga nagakinabuhi kita karon sa mga adlaw sa Sodoma? Pila man ang nagatoo niana, sulod sa bilding, ipataas lamang ang inyong kamot.

¹⁵³ Nagakinabuhi kita, sama kaniadto, sa Sodoma. Ang tibuok sistema nahimo nang mahugaw, ang kalibutanong sistema, ang tanan-tanan, ang sistemang iglesia, ang pulitikanhong sistema. Wala na gayud og unsa pa. Mahugaw na kaayo ang pulitika. Ang

mga sistema, sa tanang dapit, ang atong mga diktadur, mahugaw na tanan. Nahimo nang ingon niana usab ang iglesia. Ang mga pamilya nahimong ingon niana na usab. Kahugawan na tanan, Sodoma na gayud!

¹⁵⁴ Dayon, hinumdumi, giplastar na kana sa Dios sa atubangan ninyo, hinumdumi kaniadto nga nag-ingon Siya nga Iyang igarepresentar ang Iyang Kaugalingon diha sa tawhanong lawas, ug pagabuhaton ang sama sa Iyang gibuhat kaniadto sa dili pa ang Sodoma, sa wala pa miabot sa esena ang gisaad nga Anak. Nagsaad Siya nga magpadala og usa nga magauna sa niadtong gisaad nga Anak, sama sa Iyang gibuhat niadtong unang higayon, nga maoy magapaila; ug ingon Niya, “Sa diha nga ginapadayag na ang Anak sa tawo.”

¹⁵⁵ Wala ako nakaila kanimo. Bueno, Miss. Thompson, kanang sakit nga iya sa babaye ug mga komplikasyon, nagatoo ka ba nga pagaayohon ka sa Dios? Matoohan mo ba kini? Toohan mo ba? Miss., Miss. Thomas, nagatoo ka ba nga ayohon ka Niya? Ipataas ang imong mga kamot, kung ingon-ana.

¹⁵⁶ Adunay usa ka babaye nga nagalingkod sa imong likod mismo. Nagaampo siya. Aduna siya’y arthritis.

¹⁵⁷ Ang usa nga nagalingkod sunod kaniya, maoy sakit sa tiyan, nga nagaampo usab. Mapalagpas ninyo kini, kung dili kamo magbantay. Dili kamo taga-dinhi. Taga-Mississippi kamo. Kamo si Mr. ug si Mrs. Kramer. Kung nagatoo kamo sa tibuok ninyong kasingkasing, pagaayohon kamo ni Jesus Cristo. Kon mahimo ninyong toohan kini. Nagatoo ba kamo? Kung ingon-ana mahimo ninyong dawaton kini. Okey. Ipataas ang inyong mga kamot aron nga makita sa mga tawo nga kamo kini.

¹⁵⁸ Wala ako nakaila kanilang mga tawo. Wala ko pa gayud sila nakita, sa tibuok kong kinabuhi. Kinahanglan kang magtoo, higala. Ginapaila Niya ang Iyang Kaugalingon. Nagatoo ba kamo niana, sa tibuok ninyong kasingkasing? [Nagaingon ang kongregasyon, “Amen.”—Ed.]

¹⁵⁹ Nganong giyango-yango mo man ang imong ulo, sir, ug nagatan-aw kanako nga sama niana? Oo, sir. Tungod kay gihimo mo kana, magapakigsulti ako kanimo sa makadiyut. Medyo usa ka ka edaran na nga lalaki nga nagalingkod mismo dinha, nga nagalantaw kanako. Naglantaw siya kanako, nga ingon ka sinsero. Gitoohan niya kini. Nagaampo ikaw alang sa usa ka tawo nga nagkaaduna og stroke. Apan—apan ang pinakaunang butang nga ginaampo mo, nga gikinahanglan mo, ginapangita mo ang pagbautismo sa Espiritu Santo. Husto kana. Uh-huh. Husto kana. Kung ginatoohan mo gayud kini! Ang babaye, nagapangita ka og matrabahoan. Gawas pa niana, aron nga mahibaloan mo nga ako usa ka propeta sa Dios, o alagad, naoperahan ka na sa duha ka higayon. Medyo nagpaluya kini kanimo. Ang tanan na nga matang sa kahimtang, sakit sa

espirituwal. Gusto kong isulti kanimo nga okey na kini tanan. Giayo ka sa imong pagtoo.

¹⁶⁰ [Blangko nga bahin sa teyp—Ed.] . . . nagalingkod nga sunod mismo kanimo dinha. Nagaampo ang maong babaye. Tan-aw dinhi. Nadungog ka Niya, ug nahikap mo Siya. Wala ako nakaila kanimo, apan nakaila Siya kanimo. Sultihan ta ka kung unsa ang imong ginaampo. Nagatoo ka ba sa tibuok mong kasingkasing? Aduna ka’y sakit sa pantog, nga imong ginaampo. Nagatoo ka ba nga ayohon ka sa Dios ug himoon kang maayo na? Ikaw mao si Mrs. Smith. Husto kana. Ipataas ang imong kamot.

¹⁶¹ Kita n’yo, Iyang ginapaila ang Iyang Kaugalingon. Unsa man kini? Ang Binhi kini ni Abraham, ang pagtoo nga aduna kaniadto si Abraham, si Ginoong Jesus Cristo sa taliwala nato, nga nagapanghimatuod sa Iyang Pulong, uban sa naganunot nga mga ilhanan.

¹⁶² Kinsay, pila man ka mga kard ang igaampo, ipataas ang inyong mga kamot, nga may kard? Oh, mas maayo nga sugdan na nato ang linya sa pagpaampo.

¹⁶³ Nakita n’yo, dili ba nga nakasabot kamo? Karon kana nga espiritu dili lamang. . . Wala kana nagapang-ayo. Ginapaila lang niana nga ania Siya dinhi. Ang inyong mga pastor aduna usab og ingon niana nga awtoridad sa pag-ampo alang sa mga masakiton. Wala nila ginabuhay ang ingon niana; wala, wala gayud. Apan sila—apan aduna lang sila og mao ra nga awtoridad, “Maganunot kini nga mga ilhanan sa mga magtotoo.”

¹⁶⁴ Karon gusto ko nga ang mga higala kong mga pastor dinhi. [Ginapangutana ni Igsoong Branham ang usa ka tawo, “Okey lang ba nga magpanawag gikan sa mga mananambong, mga ministro?”—Ed.]

¹⁶⁵ Pila man ka mga pastor dinhi ang nagatoo sa tibuok ninyong kasingkasing, mga ministro dinhi, nga nagatoo? Oh, salamat. Unsa kaha kung manindog kamo? Anhi mo dinhi, magtindog uban kanako sa makadiyut lang, dinhi mismo dapit, nga mag-ampo alang sa mga masakiton. Anhi mo dinhi. Karon bantayi ninyo ang nagakahitabo nga mga pag-ayo, bantayi kung unsay magakahitabo.

¹⁶⁶ Gusto ko nga moanhi kamo, magporma og—og doble nga linya mismo dinhi. Moanha ako sulod sa pipila ka minuto, aron mag-ampo alang sa mga masakiton. Gusto ko ang nagatoo nga mga pastor nga gustong magpaila sa ilang mga kaugalingon ingon nga mga magtotoo. Nga, nagatoo kamo, nga sa inyong pag-anhi, nagkinabuhi kamo og usa ka balaan, mahinlo nga pagkinabuhi. Hinumdumi, tan-awa dinhi kung unsa ang nagapaanhi, nga nagarepresentar sa Ebanghelyo ni Cristo!

¹⁶⁷ Igsoong Blair, kabalo kong anaa ka dinha, ikaw o si Igsoong Pat. Mahimo bang iporma ninyo kanang duha ka linya sa

kasagarang paagi nga ginabuhat ninyo kini, kung mahimo, ikaw ug si Igsoong Pat.

¹⁶⁸ Magtotoong mga pastor nga magatoo gayud! Karon, tan-awa, kung mapaila sa Dios ang Iyang Kaugalingon pinaagi sa Iyang Pulong, uban sa Iyang Pulong, pila ba ang nakahibalo nga sa Biblia kana, miingon si Jesus og ingon niini, “Kini nga mga ilhanan maganunot kanila nga nagatoo. Kung ilang ipandong ang ilang mga kamot sa mga masakiton, mangaayo ang mga niini?” Mga pastor, mianhi kamo aron nga ipaila ang inyong mga kaugalingon ingon nga mga magtotoo. Dili ba? Mga magtotoo kamo (dili ba?), o wala unta kamo nagatindog dinhi. Karon unsa ma’y giingon ni Jesus? “Kini nga mga ilhanan maganunot kanila nga nagatoo.” Usa ako ka magtotoo uban kaninyo.

¹⁶⁹ Paanha na ako. Ato kining mga tawo, ug kita’y mga magbalantay sa niining mga panon. Paanha na ako aron nga isalibay na ang akong pukot uban kaninyo karon, ipandong ang akong mga kamot uban sa inyoha. Ug sa diha nga nagaagi kini nga mga tawo, kung aduna og unsa man nga butang nga medyo gamay nga pagduhaduha diha sa inyong hunahuna, tangtanga kini mismo karon; aron nga sa pag-agi niining mga tawo, dayon ang matag usa kanila nga nagaagi, ug ipandong nato ang atong mga kamot diha kanila, mangaayo sila. Motoo ba kamo sa tibuk ninyong kasingkasing karon, ang matag usa? [Nagaingon ang mga ministro, “Amen.”—Ed.]

¹⁷⁰ Pila man sa mga ania dinhi ang magaampo alang sa uban sa diha nga nagaagi sila, ipataas ang inyong kamot, “Magaampo ako.”

¹⁷¹ Hinumdumi, mahimo nga inyo kining amahan, inyong inahan, inyong anak nga babaye o anak nga lalaki, igsoon nga babaye o igsoon nga lalaki. Ug kung dili man sa inyo, iya kini sa uban, nga mamaania niining linya. Ug unsa kaha kung sila kini, ug mamatay na sila tungod sa kanser, o sa kung unsa nga makalilisang nga balatian, dili ba ninyo gusto nga mamahimong sinsero ang tawo? Siguradong, gusto nato.

¹⁷² Karon, nagtoo kong, unsaon man ninyo . . . Karon ang mga niini sa *niining* linya dinhi, sa niining pasilyo, tindog mo dinha *nianang* dapita, nga dala ang prayer card. Tindog mo dinha *nianang* dapita, ang tanan nga anaa sa tuo nga bahin. Karon, ang agianan, pabilin lang ang mga sa wala nga bahin; nanghuot man gud tang tanan, nakita n’yo, ug wala mo nahibalo unsaon nato, unsa nay atong ginabuhat. Sige, ang tanan nga anaa *niini* nga bahin, magtindog mo *dinhi*. Karon, ang tanan nga anaa sa tuo nga bahin, pag-anhi lang mo sa niini nga direksyon, tungod kay mokanaug mo, molibot mo.

¹⁷³ Ug unsaon man ninyo, unsaon man nila paggawas, Igsoong Borders? Sa kilid nga pultahan mismo, molibot lang ug pasulod na usab sa bilding.

174 Busa, sa diha nga tawgon na *kini* nga bahin, sa pipila ka minuto, ug mangtindog na sila. Ug tan-awon nato karon unsay . . . Sige, silang mga anaa sa *niini* nga dapit, libot mo niini nga dapit dinhi. Kupti ang inyong mga prayer card, pag-anhi mo niini nga bahin. Ug kamo nga anaa sa balkonahe, mokanaug mo aron tagbuon sila didto sa tumoy sa linya didto. Karon ang mga sa niining wala nga bahin, pag-acto mo sa wala usab nga bahin. Ug dayon, nakita n'yo, maglina mo ug dayon balik mo *nianang* dapita; libot sa likud, libot mo *nianang* dapita. Kita n'yo? Ug inyong sundon ang maong linya palibot mismo, dayon dili kita magkagubot.

175 Ug dayon kamo nga anaa dinha sa balkonahe, pumuwesto lang mo sa *nianang* mga pasilyo, ug magduol lang sa diha nga nagaanha na sila.

176 Karon, pagsugod lang mo lakaw sa likod dinha, ang matag usa, diretso lang lakaw hangtud nga matagbo n'yo kini nga linya mismo *dinhing* dapita. Anhi lang diretso, *dinhi* dapit, sugdi lang paglakaw diretso ug duol mismo niining linya *dinhi*.

177 Oh, unsa gyud kaha ang mahitabo karon! Unsa gyud kaha ang mahitabo! Mamahimong usa kini ka higayon kon diin aduna gyu'y butang nga mahitabo. Sige.

178 Karon, husto kana, libot lang mo *nianang* dapita, ug mag-apil mismo sa linya, sama niana. Tuyok lang mo niining pasilyo. Ingon niana ha.

179 Ug karon sa diha nga nanagtindog na mo, ang tanan nagtindog na, magahalad kita og usa ka pag-ampo. Ug kini nga kongregasyon magaampo uban kanako, aron nga mangaayo kamo. Magtoo lang karon. Ug ayaw'g. . .

180 Anhi na mo dinhi, mga anaa dinha sa likod, anhi na mo dinhi ug maglina mo dinhi dapit. Anhi na mo, paghimo mo og usa ka daku nga linya. Pag-anha *niana* nga dapit, ug paghimo mo'g usa ka linya. Mao kana.

181 Mag-ampo ang tanan. Magmatinoohon gyud kamo karon. Ayaw lang tagda karon ang mga tawo. Hinumdumi, kita—gilukop kita karon sa Presensiya ni Jesus Cristo, nakadepende na kanato ang pagpasidungog kung unsay Iyang gibuhat sa taliwala kanato, pinaagi sa pagtoo sa Iyang Pulong.

182 Maayo gyud kana. Karon mamahimo gyud nga maayo kini. Sa tan-aw ko nga nagakanindot na kana nga linya.

183 Karon samtang nga nanagtindog silang tanan, gusto ko sa matag tawo karon, sulod sa bilding, nga iduko ang inyong ulo.

184 Ginoong Jesus, duol na kini nga mahitabo. Kinahanglan nga himoon na gyud ang pagdesisyon karon. Nagatoo ba kami nga ania Ikaw? Nahigugma ba kami Kanimo? Aduna ba kami og pagtoo, Ginoo, nga sigo alang sa kung unsay among pagahangyoon? Ginapaila sa niining mga tawo ang ilang mga

kaugalingon pinaagi sa pagtindog sa maong linya. Ginoo, hinaut nga dili kini mamahimong kawang. Hinaut kini, Ginoo, nga magaaagi sila dinhi, magaaagi ang matag usa nga sama gayud nga nagaagi sila ilalum ni Cristo, kay nahibalo kami nga ania Siya. Ug nagaampo kami nga madawat nila ang ilang pagkaayo. Nakasigurado ako nga bisan sulod sa umaabot nga mga semana, mangadto kini nga mga tawo sa ilang mga pastor, mga babayeng may pang-babayeng sakit, sakit sa tiyan, mga lalaking may sakit sa prostate, tanan na nga matang sa mga sakit, mangaayo, nga nagaingon, “Kabalo ka, mibiya na kanako ang maong sakit,” kay ania sila sa Imong Presensiya. Hinaut nga magaaagi sila karon ug—ug angkonon kining hinungdan sa Imong pagkamatay. Mga Binhi sila ni Abraham, ug nangbuntog Ka alang kanila. Hinaut nga mangduol sila ug dawaton kung unsa ang Imong gikahatag alang kanila.

¹⁸⁵ Ug, Satanas, nahibutyag ka na niini nga semana, hangtud nga nahibaloan mo nga usa ikaw ka nabuntog na nga linalang. Gibuntog ka na ni Jesus Cristo didto sa Kalbaryo. Nabanhaw Siya sa ikatulo nga adlaw, alang sa pagpamatarung kanamo, ug nagatindog Siya karon sa taliwala namo. Ug nakasentro ang among pagtoo ngadto Kaniya, ug halayo gikan kanimo o sa bisan unsa man nga imong gibuhat. Biyai kini nga mga tawo, sa Ngalan ni Jesus Cristo.

¹⁸⁶ Sige, sugdan na ang linya. [Si Igsoong Branham ug ang mga ministro nagapandong sa ilang mga kamot ngadto sa mga masakiton ug nagaampo sa matag usa niini diha sa linya sa pagpaampo. Blangko nga bahin sa teyp—Ed.]

¹⁸⁷ Ato nang gibuhat kung unsa gayud ang gipabuhat kanato sa Agalon. Pila ba kaninyo nga naglinya nianang laray, ang mitoo nga mamaayo kamo, ipataas ang inyong kamot. Ginapataas ko usab ang akong kamot uban kaninyo.


¹⁸⁸ Unsa man ang atong ginabuhat dinha, sa katapusan, ingon nga usa ka pundok sa mga ministro dinha; daghan kanila ang masakiton, kabalo ko, apan ginapaninguhaan nila ang ilang mahimo nga mahiapil ang ilang kongregasyon, mahiapil man sila o dili. Kana ang tinuod nga mga magbalantay. Ug miingon ang Balaang Espiritu kanako, “Ipapagunit mo sila og mga kamot sa usa’g usa.” Magkauban nga atong ginahikot ang atong mga kasingkasing ug mga pukot, ug ang atong mga pag-ampo, nga magkadungan.

¹⁸⁹ Jesus, pagaayohon Mo sila, usab. Ug himoa sila nga malig-on nga mga magbalantay, nga lig-on diha sa Pulong sa Ginoo.

¹⁹⁰ Hinaut Dios, mga kaissoonan ko, hinaut nga Iyang ihatag kaninyo ang tanang tinguha sa inyong kasingkasing. Hinaut nga alagaron ninyo Siya sa tanang mga adlaw, ug magkaaduna og gahum sa Dios diha sa inyong mga kinabuhi, aron alagaron kining maayo kaayong pundok sa mga tawo. Hinaut nga si Jesus

Cristo, Nga miuban kanato, ug uban ninyo sa tanang panahon, hinaut nga dugang pa Niyang himoon ang Iyang Kaugalingon nga inila diha kaninyo kay sa kaniadto.

¹⁹¹ Kamong mga tawo, ang uban kaninyo nga bakul na, mahimo nga dili ninyo makita ang kalainan sulod sa pipila ka panahon, mahimong wala kamo'y makitang kalainan. Tan-awa kung unsa ang gibuhat kaniadto ni Abraham. Walay unsa man nga kalainan bisan pa man; dili ingon niana ang inyong ginatan-aw. Wala kamo nagatan-aw sa mga sintoma. Tan-awa kung unsa ang Iyang giingon. Kung moingon kamo, "Mabati ko pa sa gihapon ang sakit," wala kana og unsa man nga kahilambigitan niini. Gihimo mo na kung unsa ang giingon sa Dios nga buhaton. Kita n'yo, ayaw tan-awa kana. Tan-awa kung unsa ang Iyang giingon. Nag-ingon ang Dios nga mao kana! Ginatoohan ko kini. Ginatoohan ba ninyo? [Nagaingon ang kongregasyon, "Amen."—Ed.] Sa tibuok kong kasingkasing, ginatoohan ko kini.

¹⁹² Ang Ginoong Dios magapanalangin kaninyo hangtud nga makita ko na usab kamo. Ang akong mga pag-ampo alang kaninyo; nga ang gabii dili magmangitngit kaayo, nga ang ulan dili magbubo og kusog kaayo. Magaampo ako alang kaninyo. Iampo ninyo ako. Hangtud nga magkita na usab kita, ang Dios magapanalangin kaninyo. Karon ang igsoon na nga nagapastor, kita n'yo. 

*PAGPANAG-IYA SA GANGHAAN SA
KAAWAY PAGHUMAN SA PAGSULAY CEB64-0322*
(Possessing The Gate Of The Enemy After Trial)

Kining Mensahe ni Igsoong William Marrion Branham, una giwali sa Ingles niadtong Domingo sa hapon, Marso 22, 1964, didto sa Denham Springs High School sa Denham Springs, Louisiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2015 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org